

Fanlar akademiyasi prezidenti bilan ochiq muloqot

O'zbekiston Respublikasi Fanlar akademiyasi prezidenti B.S.Yuldashev FA Navoiy bo'limiga tashrif buyurib, Bo'lim rahbariyati, ilmiy xodimlari, doktorantlari va stajyor-tadqiqotchilari bilan davra suhbatini o'tkazdi.

Uchrashuvda B.S.Yuldashev so'nggi yillarda O'zbekiston Respublikasi Prezidenti Shavkat Miromonovich Mirziyoyev tashabbusi bilan respublikada ilm-fan va ta'lim sohasida yuz berayotgan o'zgarishlar, olimlar va o'qituvchilarga, hususan, ularni moddiy rag'batlantirishga, samarali faoliyat olib borish uchun shart-sharoitlarni yaxshilashga va jamoatchilik o'rtasida nufuzini oshirishga yo'naltirilgan sa'y-harakatlar to'g'risida to'xtalib o'tdilar.



Shuningdek, ilm-fanga o'zini bag'ishlashga qaror qilgan yoshlar oldida barcha eshiklar ochilganini, faqat mamlakat taraqqiyotiga o'z hissasini qo'shish istagini bildirish zarurligini ta'kidladilar. Misol uchun, ularga maxsus tashkil etilgan jamg'arma mablag'lari hisobidan nufuzli xorijiy ilmiy-tadqiqot muassasalari va oliy o'quv yurtlarida stajirovkalar tashkil etilmoqda, doktorantlar va stajyor-tadqiqotchilarga esa munosib stipendiya berib borilmoqda.

FA prezidenti to'rt yildan kamroq vaqt ichida Bo'limda bajarilgan ilmiy ishlarni ijobiy tomonlari bilan bir qatorda tanqidiy baholab, e'tibor berish kerak bo'lgan bir qator masalalar borligini ta'kidladilar. Ular orasida O'zbekistonning tegishli ilmiy-tadqiqot muassasalari bilan aloqalarni yo'lga qo'yish va ularning laboratoriyalarida eksperimentlar o'tkazish, olingan natijalarni Scopus va Web of Science bazalarida indeksatsiya qilinadigan jurnallarda maqolalar nashr etish, ixtiro va foydali modellarga patent olish uchun talabnoma berish, ilmiy ishlanmalarni tijoratlashtirish, grant loyihalarini rasmiylashtirish aytib o'tildi. Bundan tashqari, B.S.Yuldashev FA Navoiy bo'limi fan, ta'lim va ishlab chiqarish integratsiyasini tashkil

etish uchun tegishli ravishda hududdagi yirik sanoat korxonalarining, birinchi navbatda, Navoiy kon-metallurgiya kombinatining texnik, texnologik va ekologik muammolarini hal etish uchun Yurtboshimiz tashabbusi bilan 2017-yilda tashkil etilganini alohida ta'kidlab, shu masalaga e'tiborni kuchaytirish kerakligini, shuningdek, oliy o'quv yurtlarining talabalari va magistrarlari bilan ishlashni jadallashtirish kerakligini ta'kidlab o'tdilar.

Shu bilan birga, B.S.Yuldashev tadbir ishtirokchilarning har biri bilan alohida suhbatlashdilar, ularning ilmiy ishlari haqidagi qisqacha hisobotini tingladilar, kelgusida ilmiy faoliyatni samaradorligini oshirishga yo'naltirilgan qimmatli tavsiyalar berdilar. Misol uchun, Qoraqalpog'iston Respublikasida Orol bo'yi hududlarini ko'kalamzorlashtirish loyihasini amalga oshirishga hissa qo'shish maqsadida saksovul ekishda Bo'lim olimlari tomonidan ishlab chiqilgan usulni qo'llash, ya'ni, saksovul urug'ini bentonit gillari kukuni bilan ekishdan oldin qobiqlashni va Navoiy bo'limi tomonidan Nurota tumanida amalga oshirilayotgan "Innovatsion pedagogikadan moderatorlarni tayyorlash" loyihasini butun viloyat va respublikaga targ'ib qilishni tavsiya qildilar. Bundan tashqari, ijtimoiy sohani e'tiborsiz qoldirmaslik, buning uchun ushbu yo'nalishda fundamental loyihalarni tayyorlash muhim ahamiyatga ega ekanligini ta'kidladilar.